



Sud Bosne i Hercegovine
Суд Босне и Херцеговине

Broj: S1 3 Iž 044123 22 Iž
Sarajevo, 18.10.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović, predsjednika vijeća, Mirsade Džindo i Redžiba Begića, članova vijeća, odlučujući o žalbi Dervišbegović Fikreta, kandidata političke stranke Stranka demokratske akcije-SDA, ..., V., izjavljenoj protiv odluke Centralne izborne komisije Bosne i Hercegovine broj: 05-01-07-5-4132/22 od 11.10.2022.godine, o utvrđenoj odogovrnosti i novčanom kažnjavanju za kršenje odredbi Izbornog zakona BiH, na nejavnoj sjednici održanoj dana, 18.10.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je

(1) Politička stranka Stranka demokratske akcije-SDA, odgovorna što je Fikret Dervišbegović, nosilac izvršne funkcije i mandata predsjednika Mjesne zajednice Moštre Visoko i kandidat ove političke stranke za Skupštinu Zeničko-dobojskog kantona na Opštim izborima 2022. godine, zloupotrebio javno sredstvo i resurse za vlastitu upotrebu i promociju političkog subjekta kojem pripada, čime je prekršila pravila ponašanja u izbornoj kampanji iz člana 7.2a stav (2) tačka c) Izbornog zakona BiH, pa joj je izriče novčana kazna u iznosu od 3.000,00 KM.

(2) Odlukom je utvrđeno da je Fikret Dervišbegović, nosilac izvršne funkcije i mandata predsjednika Mjesne zajednice Moštre Visoko i kandidat političke stranke Stranka demokratske akcije-SDA za Skupštinu Zeničko-dobojskog kantona na Opštim izborima 2022. godine, zloupotrebio javno sredstvo i resurs za vlastitu upotrebu i promociju političkog subjekta kojem pripada, čime je prekršio pravila ponašanja u izbornoj kampanji iz člana 7.2a stav (2) tačka c) Izbornog zakona BiH, pa mu se izriče novčana kazna u iznosu od 3.000,00 KM.

Protiv ove odluke Dervišbegović Fikreta, kandidat političke stranke Stranka demokratske akcije-SDA, blagovremeno je uložio žalbu u kojoj navodi da žalbu ulaže zbog povrede pravila postupka, pogrešno i nepotpuno utvrđenog činjeničnog stanja i pogrešne primjene materijalnog prava. Navodi da prigovor koji je podnijela politička stranka Narod i pravda sadržavao procesni nedostatak koji se ogledao u njegovom neblagovremenom podnošenju, te da je isti trebalo odbaciti, a ne postupak voditi po službenoj dužnosti. Navodi da je ovakvim postupanjem Centralna izborna komisija BiH izvršila povredu pravila postupka propisanih Izbornim zakonom BiH i dovodi u sumnju namjeru i cilj Centralne izborne komisije BiH da pod svaku cijenu izvrši kažnjavanje političkog subjekta i kandidata. Navodi da je Centralna izborna komisija bez ikakvih dokaza nezvaničnu stranicu MZ Moštre ozvaničila, a isto je imalo za svrhu jedino izricanje novčane kazne njemu kao kandidatu. Iz svega naprijed navedenog žalilac predlaže da Sud usvoji žalbu, prvostepenu Odluku preinači ili ukine i predmet uputi Centralnoj izbornoj komisiji BiH na ponovni postupak.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je pobijana odluka donesena na pravilan i potpun način.

Žalba nije osnovana.

Prema stanju u spisu Centralna izborna komisija Bosne i Hercegovine je na osnovu prigovora političke stranke Narod i pravda Gradski odbor Visoko prosljeđen putem Gradske izborne komisije Visoko, stekla saznanja koja se odnose na kršenje odredbe člana 7.2a stav (2) tačka c) Izbornog zakona Bosne i Hercegovine.

U prigovoru je navedeno, da je kandidat političkog subjekta, Stranka demokratske akcije za Skupštinu Zeničko-dobojskog kantona i trenutni predsjednik Mjesne zajednice Moštre koja egzistira u okviru Grada Visoko, Fikret Dervišbegović, zloupotrijebio sredstvo komunikacije, zvaničnu stranicu navedene mjesne zajednice, za slanje predizbomih poruka, a što se može dovesti u vezu sa zloupotrebom javnih sredstava i resursa, odnosno kršenja odredbi člana 7.2a stav (2) tačka c) Izbornog zakona BiH.

U postupku ispitivanja formalno pravne strane prigovora, Centralna izborna komisija BiH je utvrdila da je isti sadrži formalne nedostatke, jer nije blagovremeno podnesen, iz kojih razloga je u smislu člana 6.2 stav (2) i stav (3) Izbornog zakona BiH predmetni prigovor cijenila kao inicijativu za pokretnja postupka i postupak vodila po službenoj dužnosti.

Nadalje, Centralna izborna komisija Bosne i Hercegovine je nakon prijema, u skladu sa zakonskom procedurom, aktom broj: 05-1-07-5-4132/22 od 01.10.2022. godine inicijativu dostavila političkoj stranci Stranka demokratske akcije-SDA, na izjašnjenje u roku od 24h od prijema obavijesti, a posebno da se izjasni Fikret Dervišbegović. Takođe, istim aktom je tražila i izjašnjenje i od Gradske uprave Grada Visoko.

Na navedenu inicijativu, Stranka demokratske akcije-SDA u svom izjašnjenju navodi da je prigovor Gradskog odbora Visoko političke stranke Narod i pravda neosnovan,

jer se radi o objavama koje se odnose na uobičajeni rad Mjesne zajednice. Navode da su objave o održavanju skupa SDA objavljeni na stranici kandidata SDA, a ne na zvaničnoj stranici Mjesne zajednice Moštre. Iz tih razloga predlažu da Centralna izborna komisija BiH prijavu odbaci kao nedopuštenu, a u krajnjem slučaju u cjelosti odbije kao nedopuštenu.

Fikret Dervišbegović u svom izjašnjenju navodi da „Facebook” stranica na kojoj je objavljena najava skupa SDA Visoko u Moštru i njegov plakat, nije zvanična stranica MZ Moštre. Navodi da Mjesna zajednica nema registrovanu službenu niti facebook stranicu koja je u vlasništvu Mjesne zajednice. Navodi da on lično nije objavio sporni sadržaj, niti nekome dao upustvo da to uradi, te smatra daje ovo zlonamjeren postupak kako bi se njemu kao kandidatu nanijela šteta.

Do donošenja Odluke Gradska uprava Grada Visoko nije dostavila traženo izjašnjenje.

Uvidom u kompletan spis predmeta i spornu objavu na zvaničnoj „Facebook stranici” Mjesne zajednice Moštre, koja egzistira u okviru Grada Visoko od dana 29.09.2022. godine, Centralna izborna komisija Bosne i Hercegovine je utvrdila da su politička stranka Stranka demokratske akcije-SDA i kandidat ove političke stranke za Skupštinu Zeničko-dobojskog Kantona, Fikret Dervišbegović, odgovorni za kršenje odredbe člana 7.2a stav (2) tačka c) Izbornog zakona Bosne i Hercegovine, jer je Fikret Dervišbegović, kandidat ove političke stranke i nosilac mandata predsjednika MZ Moštre zloupotrebio javno sredstvo na način da je iskoristio zvanično sredstvo komunikacije ove mjesne zajednice za slanje predizbomih poruka.

Suprotno navodima podnosioca žalbe „da je prigovor koji je podnijela politička stranka Narod i pravda sadržavao procesni nedostatak koji se ogledao u njegovom neblagovremenom podnošenju, te da je isti trebalo odbaciti” valja istaći da je Centralna izborna komisija BiH nesporno utvrdila da isti sadrži formalne nedostatke, jer nije blagovremeno podnesen, ali da je u smislu člana 6.2 stav (2) i stav (3) Izbornog zakona BiH predmetni prigovor cijenila kao inicijativu za pokretanje postupka i postupak vodila po službenoj dužnosti.

Nadalje, neosnovani su navodi podnosioca žalbe "da ničim nije dokazano da se radi o profilu mjesne zajednice, jer mjesna zajednica nema zvaničan facebook profil niti facebook stranicu, kao što nije dokazano da je objava uopšte postajala" kada se uzmu u obzir dokazi koje je podnosilac prigovora dostavio i uvid u sam sadržaj objave na zvaničnoj „Facebook” stranici MZ Moštre u kojoj se poziva na predizbomi skup političkog subjekta Stranka demokratske akcije - SDA, na kojoj se nalazi slika kandidata Fikreta Dervišbegovića, kao i drugih kandidata, sa logom navedene stranke, dajući njemu i njegovoj političkoj stranci čiji je kandidat mogućnost koju drugi kandidati nisu imali iz razloga što imenovani obavlja funkciju predsjednika Mjesne zajednice Moštre. Na ovaj način je zloupotrebom svoje funkcije imao mogućnost da upozna birače i javnost o proteklim i budućim aktivnostima političke stranke kojoj pripada i njega kao kandidata, i to putem zvaničnog sredstva komunikacije Mjesne zajednice Moštre, a što je u suprotnosti sa odredbom člana 7.2a stav (2) tačka c)

Izbornog zakona BiH.

Konačno, uzimajući u obzir ostale objave na „Facebook“ stranici MZ Moštre koje su dostavljene uz prigovor, a koje Centralna izborna komisija BiH nije cijenila kao kršenje navedene odredbe Izbornog zakona BiH iz razloga što u svom sadržaju nisu upućivali na izbornu kampanju nego na upoznavanje javnosti sa redovnim aktivnostima u ovoj Mjesnoj zajednici, paušalni su navodi podnosioca žalbe da zvanična „Facebook“ stranica MZ Moštre ne postoji i da nije kreirana ako se uzme u obzir sadržaj drugih objava na ovoj „Facebook“ stranici, koje su usmjerene na upoznavanje građana ove Mjesne zajednice o svakodnevim događajima i aktivnostima koje nisu ograničene samo za izborni proces.

Samu visinu izrečene kazne ovo vijeće nije preispitalo, iz razloga što odluka u ovom dijelu nije bila ni pobijana žalbom.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
S U D I J A

Zvezdana Antonović